

**Lüleburgaz'a bağlı Sinanlı, Oruçlu, Ayvalı, Saruhanlı, Tatarlu, Alpul[İ]ju ve Örencik adında yedi köyün toprakları Sokullu Mehmet Paşa Caminin vakfı olarak değerlendiriliyor. Bu durum 200 yıldır böyle.... Yazı için kabaca 1800 tarihini temel alırsak 1600'lü yıllardan itibaren söz konusu yedi köy Sokullu'nun vakıf arazisi. Bu köylerden sağlanan gelirler Lüleburgaz'daki Sokullu vakıflarının masrafları için kullanılıyor.**

C. EV, 538-27177-1-1, 2, 3

Devletlü inâyetlü sultânım hazretleri sağ olsun.

Nezâret-i hazret-i Sadr-i azamîde masûn olan evkâflardan ber-vech-i meşruta mütevellîsi olduğum vezîr-i a'zam iken şehîden vefât eden ceddîm Şehîd Mehmed Paşa'nın evkâf-ı şerifinden Bergos'da vâki' Alpul[İ]ju ve Ayvalı ve sâir kurâ-yı vakıf vücûhla serbest ve evâmîr-i aliyye ile üzerlerine vâride olan tekâlîflerini ta'dîl ve tesviye birle kazâ tarafına edâda kusûrları olmayıp kazâ-i Bergos canibinden sülûs-i sülûsân tekâlîf iddiâları bâ-hatt-ı hümâyûn memnû' iken sâbık kâimmakâm-ı vakıf olan Bergos Kazâsı sâkinlerinden Osman Haseki ve hâlâ kâimmakâm-ı vakıf diğer Osman haseki ile ahâlî-i Bergos ve a'yân ve kâdî yek-dil olarak hilâf-ı hatt-ı hümâyûn ve muğıyir-i fermân-ı âlî mücerred sülûs-i sülûsân ahz ederiz deyu re'âyâ-yı vakıfdan on bin guruşdan ziyâde akçelerini ahz u kabz ve bu vechile vakf-ı şerifin re'âyâları perâkende vü perîşân oldukları muhakkak olmağın merâhim-i rahîmânelerinden mercûdur ki mukaddemâ verilen fermân-ı âlîşânın kaydı ba'de'd-derkenâr husûs-ı mezkûra sâbık Tekâlîf müvellâ nasb olunan es-Seyyid Lütfullah Efendi dâ'îlerine bâ-işâret-i aliyye müvellâ ve kaleminden dahi bir mu'temed kâtib muharrir ta'yîn ile mahallinde ta'dîl ve muktezâ-yı şürût hânelerine nazaran lede's-şer' tevzî' ve müceddeden tahrîr ve bu def'a taraf-ı vakıfdan kâtib-i vakıf Tahir Efendi kullarını vekîl nasb ve kâimmakâm-ı mezkûrların hesâblarını rü'yet ve ma'rîfet-i şer'le tahsîl eyledikleri mebâliği re'âyâyâ istirdâd ve bu vechile vakf-ı şerifi ve re'âyâyâ himâyet buyurulmak için bir kît'a fermân-ı âlîleri ısdâr ve inâyet buyurmaları babındna emr u fermân devletlü inâyetlü efendim hazretlerindedir. Bende, İbrahim Hanzâde Abdurrahman mütevellî-i vakf hâlâ

### **Verilen fermân**

Bergos kadısına ve Bergos'da vâki' Sadr-ı esbak Şehîd Mehmed Paşa'nın Vakfı kurâsı zâbiti ( ) zîde mecduhûya hüküm ki.... Sadr-ı a'zamım nezâretinde masûn evkâfdan merhûm Vezîr-i a'zam Şehîd Mehmed Paşa'nın evkafı kurâlarından Bergos Kasabası'nda vâki' Alpul[İ]ju ve Ayvalı nâm karye re'âyâlarının Dîvân-ı Hümâyûnuma takdîm eyledikleri arzuhâlleri mefhumunda kazâ-i mezkûre evâmîr-i aliyye ile vâride olan tekâlîfden hisselerine isâbet edeni edâda kusûrları yoğiken bu esnâda Bergos a'yânı olanlar kendü cerr ü menfa'atleri için hilâf-ı şurut te'addî vü rencideden hâlî olmadıklarından başka ısdâr ve yedlerine verilen fermân-ı âlîşânın mefhum ve mazmûn-ı münîfesine dahi kanâat etmeyip re'âyâ-yı vakıfdan mücerred sülûs tekâlîf mütâlebe eylediklerinden cümlesinin perâkende vü perîşân olmalarına bâ'is olacağını beyân birle fimâ-ba'd vakf-ı mezkûr kurâları re'âyâları evâmîr-i aliyye ile vâride olan tekâlîflerin ber-müceb-i defter-i tevzî' hisselerine isâbet edeni edâ eylediklerinden sonra Bergos Kazâsı'nın mücerred sülûs hisse tekâlîfi mütâlebesiyle vâki' olan te'addîleri men' u def' olunmak üzere emr-i şerîfim sudûrunu istid'â-yı inâyet eyledikleri ecilden Hazîne-i Âmiremde mahfûz Mevkûfât defterlerine nazar olundukda Şehîd Mehmed Paşa Vakfı karyeleri olan Sinanlı ve Oruçlu ve Ayvalı ve Saruhanlı ve Tatarlu ve Alpul[İ]ju ve Örencik nâm yedi aded vakıf karyeleri ahâlîleri

**mukaddemâ bir takrîm mu'âfiyet emri isdâr etdirdiklerine mebnî hisse-i tekâlîflerini edâda muhâlefet etmeleriyle** bu keyfiyyet kurâ-i sâireye dahi sirâyet ve ihtilâl-i nizâmı mûcib olacağına binâen ber-mûceb-i şurut tekâlîfleri kemâ fi'l-kadîm edâ eylemeleri için mukraddema kazâ-i merkûm ahâlîleri yedlerine bâlâsı hatt-ı hümâyûn-ı şevket-makrûn ile mu'anven bir kıt'a emri-âlişân verilmekten nâşî ez-kadîm olageldiği vechile bi'l-cümle tekâlîfden kurâ-i merkûme ahâlîsi isâbet eden hisselerini edâ ederler iken bu esnâda vakf-ı mezkûr mütevellîsi kemâl-i hilesinden nâşî vukû'-yâfte olan masârîf-ı vilâyeti vakf-ı mezbûr re'âyâsı verilmek üzere bir takrîb isdâr etdirdiği emri re'âyâ-yı merkûm sened ittihâzıyla hisse-i tekâlîflerini edâdan imtinâ' eylemeleri hasebiyle gerek kazâ-i mezbûr ahâlîsi yedlerine itâ olunan ve gerek vakf-ı mezbûr tarafına verilen evâmir-i şerîfe kaydları ba'de'l-ihrac ber-minvâl-i muharrer vakf-ı mezbûr re'âyâlarının muâfiyetleri bir hizmet mukâbilesinde olmadığı zâhir oldukda fukarâ-yı ra'iyetin hâl-i perîşâniyetlerine merhameten vakf-ı mezbûr kurâsı ahâlîsinin bir takrîb isdâr etdirdikleri emrin kaydı ref' ve terkîn birle hisse-i tekâlîflerini tamamen ve kâmilen edâ eylemeleriçün kazâ-i mezbûr ahâlîsi yedlerine müceddeden bir kıt'a emri-şerîfim isdâr ve itâ olunmasını bundan akdemce lede'l-inhâ ol vâki' tde Hazîne-i Âmirem kuyûdâtına nazar olundukda sadr-ı a'zamım sûtûde-şiyem ve vekîl-i mutlak sadâkat-ilm nezâretinde olan evkâfdan Sadr-ı esbak **Şehîd Mehmed Paşa'nın Bergos Kazâsı'nda vâki' câmi'-i şerîf ve imâret-i âmiresi evkafı karyeleri iki yüz seneden beri Bergos Kazâsı'na evâmir-i aliyye ile vâride olan tekâlîfi edâ edegelmişler iken muâfiyet iddiasıyla hisse-i tekâlîflerin edâdan imtinâ' eyledikleri mukaddemâ Bergos ahâlîsi taraflarından lede'l-inhâ tekâlîf şürûtu mûcebince** bin yüz seksen dokuz târîhinde bâlâsı hatt-ı hümâyû ile mu'anven bir kıt'a emri-âlişânım isdâr olunduktan sonra doksan bir târîhinde mahsûs muharrir ta'yîniyle kurâ-i merkûme tahrîr etdirilip üzerlerinde mukayyed olan hâne-i avâriz ve nüzûllerin ve evâmir-i aliyye ile vâride olan tekâlîfden ma'rifet-i şer'le ber-mûceb-i defter-i tevzî' hisselerine isâbet eden tekâlîflerin edâ eylediklerinden sonra şürût-i serbestiyetlerine ve sâir umûr [u] husûslarına zabitlerinden gayrı kimesne müdâhale etmemek üzere kaydı mahalline şerh verilmiş olduğu ve ba'dehû ber-mûceb-i tahrîr doksan bir târîhinde dahi başka emri-şerîf verildiği mukayyed olup ancak geçen sene mütevellî-i vakıf tarafından takdîm olunan arzuhâlde vakf-ı mezbûr karyeleri öteden beri mefrûzu'l-kalem ve maktû'u'l-kadem min külli'l-vücûh serbest olup evâmir-i aliyye ile vâride olan tekâlîf ve kâffe-i umurlarına zâbitân-ı vakıfdan gayrı kimesne karışmayıp vücûhla serbestiyetlerine mürâ'ât olunmak lâzımeden iken hilâf-ı serbestiyet ve mugâyir-i şürût kazâ-i mezbûra vâride olan tekâlîfden vakf-ı mezbûr kurâsı ahâlîleri hisselerini edâ eylemek üzere ahâlî-i kazâ mukaddemâ bir takrîb isdâr etdirdikleri emri-şerîfi sened ittihâz ederek tekâlîf mütâlebesiyle kurâ-yı merkûme ahâlîlerine te'addî eylediklerini beyân birle Mevkûfât ve Defter-i Hakanî kuyudâtı derc olunarak bir kıt'a emri-şerîfim verilmiş olmağla şimdi kurâ-i merkûme ahâlîleri emri- mezkûru sened ittihâz ederek külliyyen hisse-i tekâlîflerin edâda imtinâ' eyledikleri bu def'a Bergos ahâlîsinin takdîm olunan arzuhâlleri mefhumundan müstebân olup lâkin seksen dokuz târîhinde hatt-ı hümâyûn ile mu'anven verilen emri-âlişândan iki sene sonra mahsûs muharrir ta'yîniyle üzerlerinden tahrîr-i cedîd geçmiş olduğundan emri- mezkûr mensûhu'l-amel olmağla fîmâ-ba'd kurâ-i merkûme ahâlîleri üzerlerinde mukayyed olan hâne-i avâriz ve nüzûllerin ve kazâ-i mezbûre evâmir-i aliyye ile vâride olan tekâlîfden ber-vech-i ta'dîl mahallinde ma'rifet-i şer'le tanzîm olunan tevzî' defteri mûcebince hisselerine isâbet eden tekâlîflerin edâda te'allül ve muhâlefet etmemek üzere mukaddem verilen evâmir kaydları ref' ve terkîn ve tarafeyne müceddeden evâmir-i şer'î em itâsıyla tanzîmi iktizâ eylediği bâ-takrîr lede'l-arz mûcebince tanzîmine irâde-i aliyyem taalluk edip mukaddem verilen fermânların kaydları terkîn birle fîmâ-ba'd kurâ-i merkûme ahâlîleri üzerlerinde mukayyed olan hâne-i avâriz ve nüzûllerin ve kazâ-i mezbûra evâmir-i aliyye ile

vâride olan tekâlîfden ber-vech-i ta'dîl mahallinde ma'rifet-i şer'le tanzîm olunan tevzî' defteri mûcebince hisselerine isâbet eden tekâlîflerin bilâ-kusûr edâ eylemek üzere işbu sene-i mübâreke Recebi'nin ikinci günü târihiyle muvarrah vakf-ı mezkûr zabıtine hitâben başka ve Bergos Kazâsı tarafına başka iki kıt'a emr-i şerîf verilip Bergos Kazâsı ahâlîleri yedlerine verilen emr-i şerîfin bâlâsına "mûcebince amel oluna" deyu şeref-yâfte-i sudûr olan hatt-ı hümâyûn-ı şevket-makrûn bâ-fermân mâh-ı mezkûrun on birinci günü kaydı bâlâsına şerh verildiği derkenâr olunmağla imdi derkenârı mûcebince hüküm deyu fermân-ı âlî sâdır olmağın fî selhi Receb sene 1211 târihinde emr-i şerîf verildiği mukayyedir. Fermân devletlü inâyetlü sultânım hazretlerindedir. Fî 5 Ra. sene 1212. (1797). İzzetlü defterdâr efendi göresiz deyu buyuruldu. 12 R. sene [1]212 (1789). *Mûcebince mütevellî ta'yîn buyurulmak mercûdur, Ed-dâ'î es-Seyyid Mehmed Arif Dürrîzâde, Ufiye anh, İstid'â ve derkenâra nazaran muktezâsı Mevkûfât'dan*

----

İşbu arzuhâl meâli; Bergos Kazâsı'na tâbî' müteveffâ Şehîd Mehmed Paşa Evkâfı'ndan Alpu[[]]lu ve Ayvalı ve sâir kurâ ahâlîleri üzerlerine edâsı lâzım gelen avâriz ve tekâlîflerini hâl ve tahammüllerine göre ber-vech-i ta'dîl edâda kusûrları yoğiken Bergos Kazâsı sâkinlerinden ve hâssa hasekilerinden olup vakf-ı mezkûrun sâbık ve lâhık kâimmakâmları olan Osman ve diğeri Osman Haseki ahâlî-i Bergos ve a'yân ve hâkim ile ittifâken mücerred sülûs ve sülûsân tekâlîf ahz sevdâsıyla on bin guruşdan ziyâde fukaradan tahsîl ile perîşân olmalarına bâ'is olacağından bahisle kazâ-i mezkûr müceddeden muharrir ta'yîn birle tahrîr ve husûs-ı mezkûr için müvellâ ta'yîn ve kâtib-i vakf dahi taraf-ı vakıfdan vekîl nasb ve kâimmakâm-ı mezkûrların hesâbları rü'yet ve tahsîl eyledikleri mebâliğ ma'rifet-i şer'le fukaraya istirdâd olunmak üzere emr-i şerîf isdârı istid'âsından ibâret ve husûs-ı mezkûr mukaddemâ lede'l-istid'â kurâ-i merkûme ahâlîleri üzerlerinde mukayyed hâne-i avâriz ve nüzûllerin ve kazâ-i mezbûre evâmir-i aliyye ile vâride olan tekâlîfden ber-vech-i ta'dîl mahallinde ma'rifet-i şer'le tanzîm olunan tevzî' defteri mûcebince hisselerine isâbet edeni bilâ-kusûr edâ eylemek üzere sene-i sâbık Recebi'nde vakf-ı mezkûr zabıtine hitâben başka ve Bergos Kazâsı tarafına başka iki kıt'a emr-i şerîf verilip Bergos Kazâsı tarafına verilen emr-i şerîfin bâlâsına "mûcebince amel oluna" deyu şeref-yâfte-i sudûr olan hatt-ı hümâyûn-ı şevket-makrûn kaydı bâlâsına şerh verildiği derkâr ve mûcebince bâ-fermân-ı âlî sene-i mezkûr selh-i Recebi'nde dahi tekrâr emr-i şerîf verildiği derkâr ve müstebân olmağla bu sûretde sülûs ve sülûsân ta'bîriyle kurâ-i merkûmeden sülûs hisse mütâlebeleri vâki' ise hilâf-ı kayd ve mugâyir-i şürût olduğundan men' u def'îçün derkenârı mûcebince emr-i şerîf i'tâsı muktezâ-yı maslahat olup ancak istid'â olduğuna vechile müvellâ ve muharrir ta'yîni ve kâtib-i vakfın vekîl nasbıyla kazâ-i mezkûr müceddeden tahrîr ve terâfu'ları husûsları mücerred emr u irâde-i aliyyelerine menût mevâddandır. Fermân devletlü inâyetlü sultânım hazretlerindedir. Fî 8 Ra. sene 1212. (1797/1798)

### **Tahrîr şürûtu Mevkûfât'dan**

Bu makûle hâne ve tekâlîfleri husûsunda nizâmları muhtel olan kazâ ve kurânın müceddeden tahrîri için Deraliyye'den mahsûsan muharrir ta'yîn ve irsâl olunugelmekle ol kazânın kadîmî hânelerine kesr u noksân getirilmemek vechile kasaba ve kurâsı derûnlarında sâkin ve mevcûd olan re'âyâyı ale'l-infirâd ve sâdat ve askerî ve mütেকâ'idîni ale'l-esâmî tahrîr ve defter ve muâfiyet iddiâ edenlerin muâfiyetleri ne makûle hidmet mukabili olduğuna ve muafiyetlerinin iktizâ-yı vakte göre lüzûm ve adem-i lüzûmu ve sahîhu'n-neseb sâdat-ı kiram ve sahîh sefer seferler esâmî ve dirlik sâhibi askerî zümresinden bulunanların bölük ve yevmiyye ve zümrelerini bâlâ-yı esâmîlerine işâret eyleyip tama'-ı hâma teba'iyet veyahud hatıra ri'âyet ile hâne-keş

re'âyâ taifesinden olanları sâdât ve askerî ve mütekâ'idîn ve muâf zümresine ilhâk eylemekden ittikâ ve bir neferi hâric ez-defter kalmamak üzere ma'rifet-i şer'le ve cümle a'yân ve zâbitân ma'rifet ve ittifâklarıyla ta'dîl ve tesviye vechile ale'l-esâmî tahrîr ve defter edip kimesneye gadr ve himâyeden ve kasaba ve kurâsı derûnunda sâkin olan re'âyânın bir neferini hâric ez-defter bırakmaktan ve gayr-ı muâfı veyahud iktizâ-yı vakte nazaran muafiyetlerinin lüzûmu olmayanları muâf kayd eylemekden ve kimesnenin yedine bâ'is kesr-i mîrî olacak vechile send vermekden ve kazâ-i merkûmun kadîmî hânelerine kesr terettüb etdirmekden mücânebet ve gereği gibi emr-i tahrîrde dikkat ve taharrî ile hak ve adl üzere hareket ve ba'de't-tekmîl memhûr ve mümzâ defterini Dersaadet'e getirmeğe ihtimâm ü dikkat eylemek tahrîr şûrûtundandır. Fermân devletlü inâyetlü sultânım hazretlerindedir. Fî 12 R. sene 1212. (1798) , Takrîr ola

\*\*\*

C. EV, 538-27177-2-1

İbrahim Hanzâde bir kıt'a arzuhâli mefhumunda nezâret-i hazret-i Sadâret-penâhîde âsûde olan evkâfdan ber-vech-i meşruta mütevellîsi olduğu ceddî Vezîr-i a'zam-ı esbak Şehîd Mehmed Paşa merhumun evkâf-ı şerîfesi **kurâsından Bergos'da vâki' Alpul[İ]ju ve Ayvalı ve sâir kurâ ahâfileri min külli'l-vücûh serbest olduğundan gayrı evâmîr-i aliyye ile üzerlerine vâride olan tekâlîfi ta'dîl ve tesviye üzere kazâları tarafına bilâ-kusûr edâ eylediklerinden sonra Bergos Kazâsı canibinden sülûs ve sülûsân tekâlîf mütâlebesi bâlâsı hatt-ı hümâyûn ile muvaşşah verilen emr-i şerîf ile memnû' iken vakf-ı mezkûr kâimmakâmı sâbık **Bergos Kazâsı sâkinlerinden Osman Haseki ve hâlâ kâimmakâm-ı vakf diğer Osman Haseki ile Bergos kâdisi ve a'yân ve ahâlîsi yek-dil olarak hilâf-ı emr-i âlî mücerred sülûs ve sülûsân tekâlîf ahz ederiz deyu re'âyâ-yı vakıfdan on bin guruşdan mütecâviz akçe alıp bu vechile vakf-ı şerîf-i mezkûr re'âyâsının perîşânlıklarına bâ'is olacaklarını beyân birle bundan akdem Tekâlîf müvellâ nasb olunan es-Seyyid Lütfullah Efendi dâ'ileri müvellâ ve kaleminden bir mu'temed muharrir ta'yîniyle kurâ-i merkûme hâneleri ma'rifet-i şer'le müceddeden tahrîr ve mîr-i mûmâ-ileyh tarafından vekîl nasb olunan Kâtib-i vakıf Tahir Efendi kulları kâimmakâm-ı merkûmânın hesâblarını lede'r-rû'ye tahsîl eyledikleri mebâliğ ma'rifet-i şer'le re'âyâ-yı merkûme tarafına red etdirilmek üzere emr-i şerîf isdârını tahrîr ve istid'â ve mûcebince müvellâ ta'yîn buyurulması için taraf-ı hazret-i Fetvâ-penâhîden işâret-i aliyye sudûr etmekle derkenâra havâle olundukda husûs-ı mezbûr mukaddemâ dahi lede'l-istid'â kurâ-i merkûme ahâlîleri üzerlerinde mukayyed hâne-i avâriz ve nüzûllerin ve kazâ-i mezbûre evâmîr-i aliyye ile vâride olan tekâlîfdan ber-vech-i ta'dîl mahallinde ma'rifet-i şer'le tanzîm olunan tevzî' defteri mûcebince isâbet eden hisselerini bilâ-kusûr edâ eylemek üzere sene-i sâbika Recebi'nde vakf-ı mezkûr zabıtine hitâben başka ve Bergos Kazâsı tarafına başka iki kıt'a evâmîr-i şerîfe verildikten sonra Bergos Kazâsı tarafına verilen emr-i şerîfin bâlâsına "mûcebince amel oluna" deyu şeref-yâfte-i sudûr olan hatt-ı hümâyûn-ı şevket-makrûn kaydı bâlâsına şerh verilmiş olduğu ve bu makûle hâne ve tekâlîfleri husûsunda nizâmları muhtel olan kazâ ve kurânın müceddeden tahrîri için Deraliyye'den mahsûsan muharrir ta'yîn ve irsâl olunugelmekle ol kazânın kadîmî hânelerine kesr u noksân getirilmemek vechile kasaba ve kurası derûnlarında sâkin ve mevcûd olan re'âyâyı ale'l-infirâd ve sâdât ve askerî ve mütekâ'idîni ale'l-esâmî tahrîr ve defter ve muâfiyet iddiâ edenlerin muâfiyetleri ne makûle hizmet mukabili olduğu ve muafiyetlerinin iktizâ-yı vakte göre lüzûm ve adem-i lüzûmu ve sahîhu'n-neseb sâdât-ı kirâm ve sahîh sefer seferler esâmî ve dirlik sâhibi askerî zümresinden olanların bölük ve yevmiyye ve zümrelerini bâlâ-yı esâmîlerine işâret eyleyip tama'-ı hâma teba'iyet veyahud hatıra rî'âyet ile hâne-keş re'âyâ taifesinden olanları sâdât ve askerî ve mütekâ'idîn ve muâf zümresine ilhâk eylemekden ittika ve bir neferi hâric ez-defter kalmamak üzere ma'rifet-i şer' ve****

cümle a'yân ve zâbitân ma'rifet ve ittifâklarıyla ta'dîl ve tesviye vechile ale'l-esamî tahrîr ve defter edip kimesneye gadr u himâyeden ve kasaba ve kurâsı derûnunda sâkin olan re'âyânın bir neferini hâric ez-defter bırakmaktan ve gayr-ı muâfı veyahud iktizâ-yı vakte nazaran muafiyetlerinin lüzûmu olmayanları muâf kayd eylemekden ve kimesnenin yedine bâ'is-i kesr-i mîrî olacak vechile sened vermekden ve kazâ-i merkûmun kadîmî hânelerine kesr terettüb etdirmekden mücânebet ve gereği gibi emr-i tahrîrde dikkat ve taharrî ile hak ve adl üzere hareket ve ba'de't-tekmîl memhûr ve mümzâ defterini Dersaadet'e getirmeğe ihtimâm ü dikkat eylemek tahrîr şûrûtundan idüğü ba'de'l-ihrac muktezâsı lede's-suâl sülûs ve sülûsân ta'bîriyle kurâ-i merkûmeden sülûs hisse mütâlebeleri vâki' ise hilâf-ı kayd ve mugâyir-i şûrût olduğundan men' u def'îçün derkenârı mucibicne emr-i şerîf i'tâsı muktezâ-yı maslahat olup ancak istid'â olunduğu vechile müvellâ ve muharrir ta'yîni ve kâtib-i vakfın vekîl nasbı ile kurâ-i merkûmenin müceddeden tahrîri irâde-i aliyyelerine menût mevâddan idüğü Mevkûfât'dan derkenâr olunmuştur. Manzûr ve ma'lûm-ı devletleri buyuruldukda müceddeden muharrir ta'yîni terk olunarak fakat işâret-i aliyye mücebince müvellâ nasbıyla kâimmakâm-ı merkûmân rü'yet-i hesâbları irâde buyurulur ise inhadan ve derkenârlardan lüzûmsuz olan ibârât külliyyen tay olunarak Dîvân-ı Hümâyûn'dan iktizâsına göre emr-i şerîf isdârı husûsunda emr u fermân devletlü sa'âdetlü sultânım hazretlerindir.

Takrîri mücebince muharrir ta'yîni terk ve inhâ ve derkenârlardan bî-lüzûm olan ibârât külliyyen tay olunarak fakat işâret-i aliyye mantûkunca müvellâ nasbıyla kâimmakâm-ı merkûmânın rü'yet-i hesâblarıçün Dîvân-ı Hümâyûn'dan emr-i âlî isdâr olunmak buyuruldu. 24 R. sene [1]212.